



鳳凰花開

一落校門，就看著操場遠遠該頭，兩間孤栖栖、烏疏疏个日本式教室層頭，一叢又高又大个鳳凰木，開到一樹个啾紅，連背後、頂高个藍天，也襯到著火樣，晟到人目珠擘毋開。一早看著這熱情个花，人乜跔等精神起來，老舊个教室也試著明亮盡多。幾下十年過去咧，這種景致，還真真存在恁心肝肚，久久難忘。

對細人仔來講，鳳凰花係仰般珍貴个花，毋單淨花靚，還好(hoˊ)搞。記憶中，細妹仔長下在鳳凰木樹下，拈一蕊分風吹落地泥个鳳凰花，一部分、一部分擘下來，鬥出一隻閉翼想飛个蝶仔。到秋天鳳凰花謝忒，結出一莢一莢長長彎彎像關刀樣个豆莢，細俵仔撈燥忒个豆莢摘下來，準刀仔打打鬧鬧。不管細俵仔抑係細妹仔，斯搞到當有興頭。

大部分學校就有鳳凰木，到較大兜正知，六月滿樹紅釘釘个鳳凰花、撈樹頂鬧熱煎煎个蟬仔聲，係撈大家預告離別个時間到咧。鳳凰木開到鋪天蓋地，就像為著黏時愛踏出校門个畢業生，奉獻一樹个鮮花，撈熱情个祝福。在該下開始，看著鳳凰花開，有花開時優美風景个歡喜，也有離別到來个感傷。

一年一年，到鳳凰木開花，學校「青青校樹」个畢業歌就開始唱起，總分恁想起自家久無見面个同學、久無問候个先生，撈早就失忒个青春；加勝看著六、七歲入學，就在身邊捩上捩下个學生仔，又長大畢業咧，目汁就跔等流下來。熱情又無情个鳳凰花啊！仰般你熱情如火个外表裡肚，园等迫人離開个無情。

毋知哪個先生講：「幼稚園層个鳳凰花開咧。」恁聽著，總有特別个感受，鳳凰花像一隻符號，代表「離別」；像一種呼喚：「珍重、珍重！」希望從今以後，看著樹樑頂鬧鬧个鳳凰花，像千百隻紅色个蝶仔，等待大風一起，共下飛向藍天綠地，多兜熱情，少兜離情。

作者：張美容

☆詞彙學習☆

【真真】zhinˊ zhinˊ：清清楚楚。

【紅釘釘】fung dangˊ dangˊ：顏色很紅的樣子。

【襯到】cenˊ doˊ：引發出。

【加勝】gaˊ shinˊ：更加。

【鬥出】deuˊ chud：拼湊出。

【鬧鬧】nau+ nau+：花朵繁盛的樣子。

【閉翼】hiaˊ rhidˊ：翅膀微微張開。

☆文法學習☆

【準……】zhunˊ……。當作……。通常用在表示處置的句子中，與介詞「撈」或具有目的意義的動詞組「V來、V去」如「用來、拿去」等等一起出現，表示「把……當作……」。

例1：佢撈鳳凰木个豆莢準關刀搞。（他將鳳凰木的豆莢當關刀玩。）

例2：無愛著个衫莫打爽，做得剪來準抹桌布用。（不要穿的衣服別浪費，可以剪來當抹布用。）